

Mini Clinic – Dini Clinic !

Mini Clinic – Dini Clinic – sy dasch en ächte Fund
Mini Clinic – Dini Clinic – das goot vo Mund zue Mund
In däären Apotheek am Stainebürg – sy, do drybt me's bunt
duet der ebbis wee – isch irgendetwas wund
oder fyhltsch di aifach sunscht – wiene halbe Hund
no schiggese di in erschte Stogg und scho bisch ihre Kund
dert schliesse sy di online aa – sy, das isch kai Schund
denn luegt me duur di duure und goot allem z'Grund
sodass me garantiert – scho in rund ere Viertelstund
unde ghailt und gsund – wieder uusekunnt !

En Arzt isch zwoor nit doo – aber s goot esoo:
de bisch verbunde mit em Doggder via Video
und wenn dr richtig Gnopf drugsch wissesis genau
de bisch e Kind, e Maa, e Zwytter oder e Frau
Siebe Monitore hetts, sy, das isch dr Clou
uff dr ainte Sytte do hoggsch du
und äenedraa dr Teledoggder watching you
En Assistänt nimmt dini Händ und teschtet di schnäll grob
steggd hinde sini Finger yyne, vorne s Stethoskop
Hoffentlig isch's nie en Art zerstreute Heer Profässer
und misst dr Bluetdrug nit - mit em Fiebermässer
e bitzli Bluet muesch au no gää – das isch gar nit gfeerli
dr Bildschirm-Mediziner suggt ders uuse miteme Reerli
au Lääbere, Härz und Niere – duet är vo wyttem konsultiere
denn hueschtisch no ins Mikrofon, no ka ner di kuriere
zum d Lunge z priefe, muesch in Bildschirm yyne bloose
no stellt der dr Roboter scho die allererschte Prognose
denn muesch guet loose, machsch vor Freud in d Hoose
zwei Minute speeter hesch die gnau Diagnose
In e Spittel miens di uf die Art nimme transportiere
denn wens neetig isch no kenne's di grad online operiere
in jedem Fall kasch die verkirzti OP-Technik gniesse
denn per Video do ka me der e Laser yneschiesse...
uff die Art bruuchts kai Muet, denn s fliesst jo fascht kai Bluet
Byläufig froggt dr Doggder denn: « isch unden alles guet? »
und nimmts dy wunder, was er denne dert hett welle
no sait er, wisse si – s hett glaub undichti Stelle...
Seesch e bitzli gwagglig uss – und lambbe dyni Glieder
haissts am Bildschirm: nämme sy Viagra denn kunnt alles wieder
Nummen ebbis griegsch in däären Apotheek nit – gopfriedstutz
Hanf gitts nur im Consi – d Hampfle zwanzig Stutz
Mi Clinic dert am Stainebürg soll au vorusse haile
an dr Fasnacht losst me s Comité - Katheeder loo verdaile
und Mini Clinic – dini Clinic hilft au, das hett sy Raiz
wenn d' dy yberfrässe hesch in myn're oder dyn're Baiz
Nummen aine kenne sy nit haile – do wie yberall
syg e gwysse Wessels – e hoffnigsloose Fall
Dr Stainebürg isch gspeert gsy – das isch nit zum Lache
no hänn si gsait, es duet ys laid – jä sinn denn die no bache ?
me kenn zwoor scho zum Doggder koo – d Behandlig liess sich mache
nur sygs nit sicher ob me denn au wieder wurd verwache !
Foot aine yber d Clinic zymmlich lutt aa schimpfe
no dien s en ohni z frooge grad gege Tollwuet impfe
Mini Clinic – dini Clinic verschribt der denn zum Schluss
wenn nyt mee anders hälfe will – aifach Rizinus
Aber vyllicht ka me's jo per Bildschirm au no dräggsle
Und der – wenn's grad neetig isch –no s Gebiss usswäggsle

E Clinic doo – e Clinic dert – isch zwoor scho n e Sääge
Kasch dy efang Daag und Nacht und yberall loo pfläage
Nur in aim bestoot was d Gsundhait aagoot, nit die gringschti Schoonig:
D Granggekasse koscht efang dr Mietzins fyr e Woonig...
Und das zaalt der - mini und au dini clinic – sicher noonig !

D Ladäerne-Uusstellig uff em Minschterplatz und d Waage- und
Reggwisye-Uusstellig bi dr Kasäerne sin vom Määntig znacht
bis am Mittwoch demoorge! Deert und an de 3 Verkaufsständ
(CINS) in dr Stadt ka men au alli Zeedel und Schnitzelbängg, d
Blaggedde und dr Rädäbängg kaufe.